

盧照鄰集序

永嘉張遜業撰

盧照鄰字昇之幽州范陽人歲十餘就
義方之教於曹獻王善屬文聞博學拜
典籤鄧王府職焉竒重於王嘗以相如
期之徧與羣官謂言后因底疾再拜新
都尉疾作竟不能任得方士玄明膏餌
之處太白山中遇父喪嘔丹出疾益甚

徒居陽翟具茨山預爲墓掩其中著釋
疾文五悲等誦暨沉涸攣廢不堪其苦
與親屬執別遂投潁水而死時年四十
文集二十卷幽憂子三卷今無可稽是
集足以傳其槩矣論曰盧作工詞用意
超邁流凡風騷之旨或自得之悲夫然
斯人也才有餘而量不足志銳始而力
怠終禮不以節遂致藥無告救疾敗沉

梁劍室

水莫能善保皆過也且孝子三日而食
教民無以死傷生毀不滅性此聖人之
政也又曰辟踊哭之至也有筭爲之節
文也是雖爲親之至猶賢者之過之若
其賦病黎與雙槿以資生之或偏侏儒
之短飽作五悲言念榮達羞恥枯窮意
鄙何至此耶夫知道者以義安命富貴
死生處之一也奮庸遺厄天實爲之人

須彌命

也何尤乃至沒沒死非其自速與窮魚
之賦形容小人態狀莫此爲切觀詩者
得焉亦可助抵掌也
嘉靖壬子秋日



盧照鄰集序

畢

盧照隣集卷上

永嘉張遜業有功校正

江都黃 淳子篤梓行

賦

秋霖賦

覽萬物兮竊獨悲此秋霖風橫天而瑟瑟雲覆海
而沉沉居人對之憂不解行客見之思已深若乃
千井埋煙百屋涵潦青苔被壁綠萍生道於時巷
無人跡林無鳥聲野陰霾而因晦山幽曖而不明

長塗未半茫茫漫漫莫不埋輪據鞍銜悽茹歎借
如尼父去魯圍陳畏匡將饑不爨欲濟無梁問長
沮與桀溺逢漢陰與楚狂長櫛風而沐雨永棲棲
以遑遑及夫屈平既放登高一望湛湛江水悠悠
千里泣故國之長楸見玄雲之四起嗟乎子卿北
海伏波南川金河別鴈銅柱辭鳶關山天骨霜木
凋年眺窮陰兮斷地看積水兮連天別有東國儒
生西都才客屋漏船槩家虛簷石茅棟淋淋蓬門
寂寂蕪碧草於園徑聚綠塵於庖甕玉爲粒兮桂

爲新堂有琴兮室無人抗高情以出俗馳精義以
入神論有能鳴之鴈書成已泣之麟視皇天之淫
溢孰不隅坐而含頰已矣哉若夫繡轂銀鞍金杯
玉盤坐卧珠璧左右羅紈流酒爲海積肉爲巒視
襄陵而與昏墊曾不輟乎此歎豈知乎堯禹之臞
臍而孔墨之艱難

馴鳶賦

孕天然之靈質稟大塊之奇工嘴距足以自衛毛
羽足以凌風懷九圍之遠志託萬里之長空陰雲

低而含紫陽景升而帶紅經過巫峽之下惆悵彭
門之東旣而摧枯短翮寥落長想忌蒙莊之見欺
哀武溪之莫往進謝扶搖之力退慙歸昌之響腐
食多懼層巢無像屈猛性以自馴抱愁容而就養
於是傍眺德門言柵仁路不踐高梁之屋翔止吾
人之樹聽群雞於月曉侶群鶻於星暮狎蘭砌之
高低翫荆扉之新故循廣庭之一息歷長簷而逕
度若乃風去雨還河移月落徘徊亂於雙燕鳴舞
均乎獨鶴乍嘯聚於霞莊時追飛於雲閣荷大德

之純粹將輕姿之陋薄思一報之無階欣百齡之
有毛歸昌鳳
有言聲也

窮魚賦 并序

余曾有橫事被拘爲群小所使將致之深議友人
救護得免竊感趙壹窮鳥之事遂作窮魚賦常思
報德故冠之篇首云

有一巨鱗東海波臣洗靜月浦涵丹錦津映紅蓮
而得性戲碧浪以全身宥而失水屈于陽瀕漁者
觀焉乃具竿索集朋黨鳧趨雀躍風馳電往競下

任公之釣爭陳豫且之網螻蟻見而甘心獮獺聞而抵掌於是長舌利嘴曳綸爭釣拖髻控鬣撫背扼喉動搖不可騰踴無由有懷纖潤寧望洪流大鵬過而哀之曰昔予爲鯢也與爾遊乎自予羽化之後爾其遺孤俄撫翼而下負之而趨南浮七澤東汎五湖是魚也已相忘於江海而漁者猶悵望於泥塗

病梨樹賦

并序

癸酉之歲余卧病於長安光德坊之官舍父老云

是鄱陽公主之邑司昔公主未嫁而卒故其邑廢時有處士孫君思邈居之若道洽今古學有數術高談正一則古之蒙莊子深入不二則今之維摩詰及其推步甲子度量乾坤飛鍊石之竒洗胃腸之妙則其甘公洛下閔安期先生扁鵲之儔也自云開皇辛酉歲生今年九十二矣詢之鄉里咸云數百歲人矣共語周齊間事歷歷眼見以此參之不啻百歲人也然猶視聽不衰神形甚茂可謂聰明博達不死者矣余年垂強仕則有幽憂之疾椿

菌之性何其遼哉于時天子避暑甘泉邈亦微詣
行在余獨病卧茲邑聞寂無人伏枕十旬閉門三
月庭無衆木唯有病梨樹一株圍纔數握高僅盈
丈花實憔悴似不任乎歲寒枝葉零丁絕有意乎
朝暮嗟乎同託根於膏壤俱稟氣於太和而脩短
不均榮枯殊貫豈賦命之理得之自然將資生之
化有所偏及樹猶如此人何以堪有感於懷賦之
云耳

天象平運方祇廣植挺芳桂於月輪橫扶桑於日
域建木聳靈丘之上蟠桃生巨海之圃細葉枝連
洪柯條直齊天地之一指任烏兔之棲息或垂陰
萬畝或結子千年何偏施之雨露何獨厚之風煙
愍茲珍木離離幽獨飛茂實於河陽傳芳名於金
谷紫澗稱其殊旨玄光表其仙族爾生何爲零丁
若斯無輪楠之可用無棟梁之可施進無違於斤
斧退無競於班倕無庭槐之生意有巖桐之死枝
爾其高纔數仞圍僅盈尺脩幹罕雙枯條每隻葉
病多紫花凋少白夕鳥怨其巢危秋蟬悲其翳窄

怯衡飈之搖落，昇炎景之臨迫。既而地歇蒸霧，天收耀靈。西秦明月，東井流星。憔悴孤影，徘徊直形。狀金莖之的的，疑石柱之亭亭。若夫西海夸父之林，南海蚩尤之樹，莫不摩霄拂日，藏雲吐霧。別有橋邊朽柱，天上靈槎。年年歲歲無葉，無花榮辱兩齊。吉凶同軌，寧守雌以外喪，不修禊而內否。亦猶縱酒高賢，佯狂君子。爲其脗合，置其憂喜。生非我生物，謂之生死非我死。谷神不死，混彭殤於一觀。庶筌蹄於茲理。

雙槿樹賦同崔少監作 并序

蓬萊山上，卽對神仙。芸香閣前，仍觀祕寶。金懸秦市，楊子見而無言。紙貴洛城，陸生聞而罷笑。故知柔條朽幹，吹噓變其死生。落葉凋花，剪拂成其光價。方且傳石渠之故事，得槿樹之新名。足以脂粉仙臺，丹青祕府者也。若布衣黎杖，巖栖藿食，居周室而非史處，漢代而無田學。涉蕪淺文，多瞽漏宜其屏竄。用其靜默，蓋窮而思達，人之情也。卑而應高物之理也。故疾雷作而蟄虫飛，浮雲興而石鳥

潤不可廢也雖云聖朝多士而公實居之草澤有人亦國家之美事也故復獎劄劬鄙作雙槿樹賦詞義猥薄退增慙覲謹啓賦曰

方丈蓬萊邈矣悠哉芸碣石室圖天揆日若乃羲和掌日太史觀星銅渾玉策寶筭金銘地則圖書之府人則神仙之靈中有芳薜鬱鬱亭亭徒觀其兩砌分植雙階並耀葉鏤五衢榮分四照紛廣庭之霍靡隱重廊之窈窕青陸至而鶯啼朱陽升而花笑紫帶紅綈玉蕙蒼枝露華的皪風色徘徊糝

糝衰颯婀娜隈綏迫而視之鳴環動佩歌扇開遠而望之連珠合璧星漢廻狀仙人之羽蓋疑佚女之瑤臺寂寞攸利栖閑此地委命卷舒隨時榮悴外無嬰天之禍內有逍遙之致朝朝暮暮落復開歲歲年年紅以翠若夫遊蜂戲蝶封其萼輕煙弱霧絡其條去不謂之損來不謂之饒故能出君子之殊俗入詩人之舊謠齊顯昧於兩曜效生死於一朝同喪我之非我固雖凋而不凋則有亭伯儒門令思詩友翰苑擴其吞夢文鋒高而照斗詠蕪

滋之朝夕悲積薪之先後緜繡起於緹紡煙霞生
於灌莽豈與幽巖弱條澗底枯松徒冒霜而停雪
空集鳳而吟龍詎得奉仙闈之廣價連筆匠之爲
容已矣哉東方生聞而歎曰故年花落不留人今
年花發非故春倏兮夕隕忽兮朝新侏儒何功兮
短飽曼倩何負兮長貧聊寄詞於庭樹倘有感於
平津

五言古詩

奉使益州至長安發鍾陽驛

躋險方未夷乘春聊騁望落花赴丹谷奔流下青
嶂歲隳曉樹滋滉漾春江漲平川看釣侶狹徑聞
樵唱蝶戲綠苔前鶯歌白雲上耳目多異賞風煙
有竒狀峻阻將長城高標吞巨舫聯翩事羈勒辛
苦勞疲恙夕濟幾潺湲晨登每惆悵誰念復芻狗
山河獨偏喪

和王奭秋夜有所思

秋寂南軒夜悠然懷所知長河落鴈苑明月下鯨
池鳳臺有清曲此曲何人吹丹唇間玉齒妙響入

雲涯窮巷秋風葉空庭寒露枝勞歌欲有和星鬢
已將垂

詠史四首

季生昔未達身辱功不成髡鉗爲臺隸灌園變姓
名幸逢滕將軍兼遇曹仁生漢祖廣招納一朝拜
公卿白金孰云重一諾良匪輕廷議斬樊噲群公
寂無聲處身孤且直遭時坦而平丈夫當如此唯
唯何足榮

昔有平陵男姓朱名阿游直髮上衝冠壯氣橫三
秋願得斬馬劍先斷佞臣頭天子玉檻折將軍此
血流捐生不肯拜視死真若休歸來教鄉里童蒙
遠相求弟子數百人散在十二州三公不敢吏五
鹿何能酬名與日月懸義與天壤儔何必疲執戟
區區在封侯偉哉曠達士知命固不憂

大漢昔云季小人道遂振玉帛委奄尹斧鑕嬰縉
紳邈哉郭先生卷舒得其真雍容謝朝廷談笑獎
人倫在晦不絕俗處亂不爲親諸侯不得友天子
不得臣冲情甄負甌重價折角巾悠悠天下士相

送洛橋津誰知仙舟上寂寂無四隣

公業負竒志交結盡才雄良田四百頃所食常不
充一爲侍御史慷慨說何公何公何爲敗吾謀適
不同仲穎恣殘忍廢誠良在躬死人如亂麻天子
如轉蓬干戈及黃屋荆棘生紫宮鄭生運其謀將
以清國戎時來命不遂脫身歸山東凜凜千載下
穆然懷清風

望宅中樹有所思

我家有庭樹秋葉正離離上舞雙棲鳥中秀合歡

枝勞思復勞望相見不相知何當共攀折歌笑北
堂垂

七言古詩

長安古意

長安大道連狹斜青牛白馬七香車玉輦縱橫過
主第金鞭絡繹向侯家龍銜寶蓋承朝日鳳吐流
蘇帶晚霞百丈遊絲爭繞樹一羣嬌鳥共啼花遊
蜂戲蝶千門側碧樹銀臺萬種色複道交窓作合
歡雙闕連薨垂鳳翼梁家畫閣天中起漢帝金莖

雲外直樓前相望不相知陌上相逢詎相識借問
吹簫向紫煙曾經學舞度芳年得成比目何辭死
願作鴛鴦不羨仙比目鴛鴦真可羨雙去雙來君
不見生憎帳額繡孤鸞好取開簾帖雙燕雙燕雙
飛繞畫梁羅幃翠被鬱金香片片行雲着蟬鬢纖
纖初月上鴉黃鴉黃粉白車中出含嬌含態情非
一妖童寶馬鐵連錢娼婦盤龍金屈膝御史府中
烏夜啼廷尉門前雀欲栖隱隱朱城臨玉道遙遙
翠幃沒金堤挾彈飛鷹杜陵北探丸借客渭橋西

俱邀俠客芙蓉劍共宿娼家桃李蹊娼家日暮紫
羅裙清歌一轉口氛氲北堂夜夜人如月南陌朝
朝騎似雲南陌北堂連北里五劇三條控三市弱
柳青槐拂地垂佳氣紅塵暗天起漢代金吾千騎
來翡翠屠蘇鸚鵡杯羅襦寶帶爲君解燕歌趙舞
爲君開別有豪華稱將相轉日回天不相讓意氣
由來排灌夫專權判不容蕭相專權意氣本豪雄
青虬紫燕坐春風自言歌舞長千載自謂驕奢凌
五公節物風光不相待桑田碧海須臾改昔時金

階白玉堂卽今惟見青松在寂寂寥寥楊子居年
年歲歲一牀書獨有南山桂花發飛來飛去襲人
裾

懷仙引

若有人兮山之曲駕青虬兮乘白鹿往從之遊願
心足披礪戶訪巖軒石瀨潺湲橫石徑松蘿幕巖
掩松門下空濛而無鳥上巉巖而有後懷飛閣度
飛梁休余馬於幽谷掛余冠於夕陽曲復曲兮煙
莊邃行復行兮天路長脩途杳其未半飛雨忽以

茫茫山塊軋礮連寒攀石壁而無據沂泥溪而不
前何無情之白日竊有恨於皇天廻行遵故道通
川遍流潦廻首望群峯白雪正溶溶珠爲闕兮玉
爲樓青雲蓋兮紫霞裘大長地久時相憶千齡萬
代一來遊

行路難

君不見長安城北渭橋邊枯木橫槎卧古田昔日
含紅復含紫常時留霧亦留煙春景春風花似雪
香車玉輦恒闐咽若箇遊人不競攀若箇媚家不

東晉書房
新編
來折娼家寶抹蛟龍帔公子銀鞍千萬騎黃鸝一
一向花嬌青鳥雙雙將子戲千尺長條萬尺枝月
桂星榆相蔽虧珊瑚葉上鴛鴦鳥鳳凰巢裏雛鷓
兒巢空枝折飛鳳去條枯葉落任風吹一朝憔悴
無人問萬古摧殘君詎知人生貴賤無終始倏忽
須臾難久恃誰家能駐西山日誰家能堰東流水
漢家陵樹滿秦川行來行去盡哀憐自昔公卿二
千石咸擬榮華一萬年不見朱唇將玉貌唯聞青
棘與黃泉金貂有時須換酒玉塵恒搖莫計錢寄

言坐客神仙署一生一死交情處蒼龍闕下君不
留白鶴山頭我應去雲間海上逸難期赤心會合
在何時但願堯年一百萬長作巢由也不辭

明月引

洞庭波起兮鴻鴈翔風瑟瑟兮野蒼蒼浮雲卷靄
明月流光荆南兮趙北碣石兮瀟湘澄清規於萬
里照離思於千行橫桂枝於西第繞菱花於北堂
高樓思婦飛蓋君王文姬絕域侍子他鄉見胡鞍
之似練知漢劔之如霜試登高而極目莫不變而

廻腸


失群鴈 并序

溫縣明府以詩垂示余以爲古之郎官出宰百里
今之墨綬入應千官事止鴈行未宜傷嘆至如羸
卧空巖者乃可爲失群動耳聊因伏枕多暇以斯
文應之

三秋北地雪皚皚萬里南翔渡海來欲隨石燕沉
湘水試逐銅鳥繞帝臺帝臺銀闕距金塘中間鶴
鷺已成行先過上苑傳書信暫下中州戲稻梁虞

人負繳來相及齊客虛弓忽見傷毛翎頻頻飛無
力羽翮摧頽君不識唯有莊周解愛鳴復道郊哥
重竒色惆悵敬思悲未已徘徊自憐中罔極傳聞
有鳥集朝陽詎勝仙鳧邇帝鄉雲間海上應鳴舞
遠得鷓絃猶獨撫金龜全寫中年印玉鵠當變萊
蕪釜願君弄影鳳凰池時憶籠中摧折羽

盧照隣集卷上



國家圖書館, NATIONAL CENTRAL LIBRARY, TAIWAN, R.O.C.



盧照隣集卷下

永嘉張遜業有功校正


江都黃 埠子篤梓行

五言律詩

隴頭水

隴阪高無極，征人一望鄉。
關河別去水，沙塞斷歸腸。
馬繫千年樹，旌懸九月霜。
從來共嗚咽，皆是爲勤王。

巫山高



巫山望不極望望下朝氛莫辨啼猿樹徒看神女
雲驚濤亂水脉驟雨暗峰文霓裳卽此地况復遠
思君

芳樹

芳樹本多奇年華復在斯結翠成新幄開紅滿故
枝風歸花歷亂日度影參差容色朝朝落思君君
不知

入秦川界

隴阪長無極蒼山望不窮石徑縈疑斷回流映似

空花開綠野霧鶯轉紫巖風春芳勿遽盡留賞故
人同

文翁講堂

錦里淹中館岷山稷下亭空梁無燕雀古壁有丹
青隗落猶疑市苔深不辨銘良哉二千石江漢表
遺靈

石鏡寺

古墓芙蓉塔神銘松柏煙鸞沉仙鏡底花沒梵輪
前銖衣千古佛寶月兩重圓隱隱香臺夜鍾聲徹

九天

雨雪曲

虜騎三秋入關雲萬里平雪似胡沙暗水如漢月
明高闕銀爲闕長城玉作城節旄零落盡天子不
知名

昭君怨

合殿恩中絕交河使漸稀肝腸隨玉輦形影向金
微漢地草應綠胡庭沙正飛願逐三秋鴈年年一
度歸

折楊柳

倡樓啓曙扉楊柳正依依鶯啼知歲隔條變識春
歸露葉凝愁黛風花落舞衣攀折將安寄軍中音
信稀

梅花落

梅嶺花初發天山雲未開雪處疑花滿花邊似雪
迴因風入舞袖雜粉向粧臺匈奴幾萬里春至不
知來

辛司法宅觀妓

南國佳人至北堂羅薦開長裙隨鳳管促柱送鸞
杯雲光身後落雪熊掌中回到愁金谷晚不恠玉
山頽

春晚山庄率題二首

顧步三春晚田園四望通遊絲橫惹樹戲蝶亂依
叢竹懶偏宜水花狂不待風唯餘詩酒意當了一
生中

田家無四隣獨坐一園春鶯啼非選樹魚戲不驚
綸山水彈琴盡風花酌酒頻年華已可樂高興復

留人

江中望月

江水向涪陽澄澄寫月光鏡圓珠溜徹弦滿箭波
長沉鈎搖兔影浮桂動丹芳延照相思夕千里共
霑裳

明月引

筮仕無中秩歸耕有外臣人歌小歲酒花舞大唐
春草色迷三徑風光動四隣願得長如此年年物
候新

益州城西張超亭觀妓

落日明歌席行雲逐舞人江前飛暮雨梁上下輕
塵冶服看疑畫粧樓望似春高車勿遽返長袖欲
相親

還京贈別

風月清江夜山水白雲朝萬里同爲客三秋契不
凋戲鳧分斷岸歸騎別高標一去仙橋道還望錦
城遙

至陳倉曉晴望京邑

拂曙驅飛傳初晴帶曉涼霧歛長安樹雲歸仙帝
鄉澗流漂素沫巖景藹朱光今朝好風色延瞰極
天莊

晚渡浮沱敬贈魏大

津谷朝行遠冰川夕望曛霞明深淺浪風卷去來
雲澄波泛月影激浪聚沙文誰忍仙舟上携手獨
思君

相如琴臺

聞有雍容地千年無四鄰園院風煙古池臺松檟

東坡圖書府
春雲疑作賦客月似聽琴人寂寂啼鶯處空傷遊
子神

酬楊比部負外暮宿琴堂朝躋書閣率爾

見贈之作

王維集中
亦有此作

閑拂簷塵看鳴琴候月彈桃源迷漢姓松徑有秦
官空谷歸人少青山背日寒羨君栖隱處遙望白
雲端

關山月

塞垣通碣石虜陣抵祈連相思在萬里明月不長

懸影移金岫北光斷玉門前寄言關中婦愁看鴻
鴈天

上之回

回中道路險蕭關烽候多五營屯右地萬乘出西
河單于拜玉璽天子按雕戈振旅汾川曲秋風橫
大歌

紫騮馬

騮馬照金鞍轉戰入臯蘭塞門風稍急長城水正
寒雪暗鳴珂重山長噴玉難不辭橫絕漠流血幾

時乾

劉生

劉生氣不平，抱劍欲專征。
報恩爲豪俠，死難在橫行。
翠羽裝劍鞘，黃金鏤馬纓。
但令一顧重，不恡百身輕。

送梓州高參軍還京

京洛風塵遠，褒斜煙霧深。
北遊君似智，南飛我異禽。
別路琴聲斷，秋山猿鳥吟。
一乖青巖酌，空佇白雲心。

大劍送別劉右史

金碧禺山遠，關梁蜀道難。
相逢屬晚歲，相送動征鞍。
地咽綿川冷，雲凝劍閣寒。
倘遇忠孝所，爲道憶長安。

戰城南

將軍出紫塞，冒頓在烏貪。
笳喧鴈門北，陣翼龍城南。
琰弓夜宛轉，鐵騎曉參驪。
應須駐白日，爲待戰方酣。

十五夜觀燈

東坡圖書
錦里開方宴蘭缸艷早年縹彩遙分地繁光遠綴
天接漢疑星落依樓似月懸別有千金笑來映九
枝前

五言排律

西使無送孟學士南遊

地道巴陵北天山弱水東相看萬餘里共倚一征
蓬零雨悲王粲清尊別孔融徘徊聞夜鶴悵望待
秋鴻骨肉胡秦外風塵關塞中唯餘劔鋒在耿耿
氣成虹

送鄭司倉入蜀

離人丹水北游客錦城東別意還無已離憂自不
窮隴雲朝結陣江月夜臨空關塞疲征馬霜氛落
早鴻潘年三十外蜀道五千中送君秋水曲酌酒
對秋風

綿州官池贈別

輶軒遵上國仙佩下靈關尊酒妨無地聯繆喜暫
攀離言欲贈策高辯正連環野逕游雲斷荒池春
草斑殘花落古樹度鳥入澄灣欲叙他鄉別幽谷

東坡圖書所
有綿蠻

還赴蜀中貽示京邑遊好

禦宿花初滿章臺柳尚飛如何正此日還望昔多
違悵別風期阻將乖雲會稀歛衽辭丹闕懸旗陟
翠微野禽喧戍鼓春草變征衣回顧長安道關山
起夕霏

和夏日幽莊

聞有高蹤客耿介坐幽庄林壑人事少風煙鳥路
長瀑水含秋氣垂藤引夏涼苗深全覆隴荷上半

侵塘釣渚青鳧沒村田白鷺翔知君振竒藻還嗣
海隅芳

山庄休沐

蘭署乘閒日蓬扉狎遁棲龍柯踈玉井鳳葉下金
堤川光搖水箭山氣上雲梯亭幽聞唳鶴窓曉聽
鳴雞玉軫臨風奏瓊漿映月携田家自有樂誰肯
謝青谿

山林休日田家

歸休乘暇日鎰稼返秋場徑草疏王篲巖枝落帝

東坡先生詩集卷下
九
新編
桑耕田虞訟寢鑿井漢機忘戎葵朝委露齊棗夜
含霜南澗泉初冽東籬菊正芳還思北窓下高卧
偃羲皇

宴梓州南亭得池字

二條開勝跡大隱叶冲規亭閣分危岫樓臺遶曲
池長薄秋煙起飛梁古蔓垂水鳥翻荷葉山虫交
桂枝遊人惜將晚公子愛忘疲願得廻三合琴尊
長若斯

酬張少府東

昔余與夫子相遇漢川陰珠浦龍猶卧檀溪馬正
沉價重瑤山曲詞驚丹鳳林十年睽賞慰萬里隔
招尋毫翰風期阻荆衡雲路深鵬飛俱望昔雙屈
共悲今誰謂青衣道還歎白頭吟地接神仙磻江
連雲雨岑飛泉如散玉落日似懸金重以瑤華贈
空懷舞詠心

過東山谷口

不知名利險辛苦滯皇州始覺飛塵倦歸來事綠
疇桃源迷處所桂樹可淹留跡異人間俗禽同海

上鷗占苔依井被新乳傍崖流野老堪成鶴山神
或化鳩泉鳴碧澗底花落紫巖幽日暮食龜殼天
寒御鹿裘不辨秦將漢寧知春與秋多謝青溪客
去去赤松遊

送幽州陳參軍赴任寄呈鄉曲父老

薊北三千里關西二十年馮唐猶在漢樂毅不歸
燕人同黃鶴遠鄉共白雲連郭隗池臺處昭王樽
酒前故人當已老崔壑幾成田紅顏如昨日衰鬢
似秋天西蜀橋應毀東周石尚全霸池水猶綠榆

關月早圓寒雲初上鴈庭樹欲銷蟬送君之舊國
揮涕獨潸然

晚渡渭橋寄示京邑遊好

我行背城闕驅馬獨悠悠寥落百年事徘徊萬里
憂途遙日向夕時晚鬢將秋滔滔俯東逝耿耿泣
西浮長虹掩釣浦落鴈下星州草變黃山曲花飛
清渭流迸水驚愁鷺騰沙起狎鷗一起清泥道空
思玄灞遊

贈許左丞從駕萬年宮

東坡詩集卷之十一 新編
聞道上之回詔蹕下蓬萊中樞移北斗左轄去南
臺黃山聞鳳笛清蹕侍龍媒曳日朱旗卷參雲金
障開朝參五城柳夕宴栢梁杯漢時光如月秦祠
聽似雷寂寂芸香樹離思獨悠悠哉

哭金部韋郎中

金曹初受拜玉地始含香翻同五日升遽見一星
上賀客猶扶路哀人遂上堂歌筵長寂寂哭位自
蒼蒼歲時賓徑斷朝暮雀羅張書留魏主閣魂掩
漢家牀徒令永平帝千載罷撞郎

哭明堂裴簿

締歡三十載通家數百年潘楊稱代穆秦晉忝姻
連風雲洛陽道花月茂陵田相悲共相樂交騎復
交筵始謂調金鼎如何掩玉泉黃公酒壚處青眼
竹林前故琴無復雪新樹但生煙遞痛蘭襟斷徒
令寶劍懸客散同秋葉人亡似夜川送君一長慟
松臺路幾千

同崔錄事哭鄭員外

文學秋天遠郎官星位尊伊人表時彥飛譽滿司

存楚席光文雅瑤山待討論鳳詞凌漢閣龜辯單
周圍已陪東嶽駕將逝北溟鯤如何萬化盡空嘆
九飛魂白馬西京驛青松北海門夜臺無曉箭朝
奠有虛尊一代儒風沒千年隴霧昏梁山送夫子
湖水平王孫僕本多悲淚沾裳不待猿聞君絕絃
曲吞恨更無言

羈卧山中

卧壑迷時代行歌任死生紅顏意氣盡白壁故交
輕澗戶無人跡山窓聽鳥聲春色綠巖上寒光入

溜平雪盡松帷暗雲開石路明夜伴饑鬼宿朝隨
馴雉行度溪猶憶處尋洞不知名紫書常日閱丹
藥幾年成扣鍾鳴天鼓燒香厭地精倘遇浮丘鶴
飄飄凌太清

結客少年場行

長安重游俠雒陽富才雄玉劔浮雲騎金鞭明月
弓鬪鷄過渭北走馬向關東孫賓遙見待郭解暗
相通不受千金爵誰論萬里功將軍下天上虜騎
入雲中烽火夜似月兵氣曉成虹橫行徇知己負

羽遠從戎龍旌昏朔霧鳥陣捲胡風追奔瀚海咽
戰罷陰山空歸來謝天子何如馬上翁

贈李榮道士

錦節銜天使瓊仙駕羽君投金翠山曲巽壁清江
濱圓洞開丹鼎方壇聚絳雲資貺幽難識空歌迥
易分風搖十洲影日亂九江文敷誠歸上帝應詔
在明君獨有南冠客耿耿泣離群遙看八會所真
氣曉氛氲

早度分水嶺

年年遊蜀道萬里向長安徒費周王粟空禪漢吏
冠馬蹄穿欲盡貂裘故轉寒層冰橫九折積石凌
七盤重谿既下漱峻峰亦上千隴頭聞戍鼓嶺外
咽飛湍瑟瑟松風急蒼蒼山月團傳語後來者斯
路誠獨難

三月曲水宴

風煙彭澤里山水仲長園由來棄銅墨本自重琴
樽高情邈不嗣雅道今復存有美光時彥養德坐
山樊門開芳杜逕室距桃花源公子黃金勒仙人

東坡圖書府
新編
紫氣軒長懷去城市高詠狎蘭蓀連沙飛白鷺孤
嶼笑玄猿日影巖前落雲花江上翻興闌車馬散
林塘夕鳥喧

宿晉安亭

聞有絃歌地穿鑿本多奇遊人試一覽臨翫果忘
疲窓橫暮落葉簷卧古生枝舊石開紅檻新荷覆
綠池孤猿稍斷絕白鳥復參差汎灑月華曉徘徊
星鬢垂今日刪書各悽惶君詎知

于時春也慨然有江湖之思寄贈柳九隴

提琴一萬里負書二十年晨攀偃蹇
泉翔禽鳴我側旅獸過我前無人且無事獨酌還
獨眠遙聞彭澤宰高弄武城絃形骸寄文墨意氣
託神仙我有壺中夢題爲物外篇將以貽好道道
遠莫致旃相思勞日夜相望阻風煙坐惜春華晚
徒令客思懸水去東南地氣凝西北天關山悲蜀
道花鳥憶秦川天子何時問公卿本亦憐自哀還
自樂歸藪復歸田海屋銀爲棟雲車電作鞭倘遇
鸞將鶴誰論貂與蟬萊洲頻度淺桃實幾成圓寄

言飛鳥爲歲晏同聯翩

至望喜矚目言懷貽劍外知己

聖圖夷九折神化掩三分緘愁赴蜀道題拙奉虞
薰隱嶙度深谷遙裊上高雲碧流遞縈注青山互
糾紛無由召宣室何以答吾君

赤谷安禪師塔

獨坐巖之曲悠然無俗紛酌酒呈丹桂思詩贈白
雲煙霞朝晚聚猿鳥歲時聞水華競秋色山翠含
夕曛高談十二部細覈五千文如如數冥昧生生

理氛氲古人有糟粕輪扁情未分且當事芝朮從
吾所好云

同臨津紀明府孤鴈

三秋違北鴈萬里向南翔河洲花稍白關塞葉初
黃避繳風霜勁懷書道路長水流疑箭動月照似
弓傷橫天無有陣度海不成行會看刷鳴羽還赴
上林鄉

五言絕句

登玉清

絕頂橫臨日孤峯半倚天徘徊拜真老萬里見風
煙

曲池荷

浮香繞曲岸圓影覆華池常恐秋風早飄零君不
知

浴浪鳥

獨舞依盤石群飛動輕浪奮迅碧沙前長懷白雲
上

臨塔竹

封霜連錦砌防露拂瑤階聊將儀鳳質暫與俗人
諧

含風蟬

高情臨爽月急響送秋風獨有危冠意還將衰鬢
同

葭川獨泛

倚棹春江上橫舟石岸前山暝行人斷迢迢獨泛
仙

送二兄入蜀

關山客子路花柳帝王城此中一分手相顧憐無聲

宿玄武二首

方池開曉色圓月下秋陰已乘千里興還撫一絃琴

庭搖北風柳院繞南溟會累宿思方重窮秋嘆不深

九隴津集

落落樹陰紫澄澄水華碧復有翻飛禽徘徊疑曳

鳥

遊昌化山精舍

寶地乘峯出香堂接漢高稍覺真途近方知人事勞

雜言騷體

五悲

悲才難

一悲曰恭聞古之君子兮將遠適乎百蠻何故違
父母之中國從禽獸於末班將矯詞兮不往將背

俗兮不還寧曲成而薄喪不直敗以厚顏彼聖人
兮猶若此況不肖與中間古往今來邈矣悠哉稽
生玉折顏子蘭摧人兮代兮俱盡代兮人兮共哀
至如左丘失明冉耕有疾兵法作而斷足史記脩
而下室高明者鬼瞰其門正直者人怨其筆雖爲
鏡於前代終抱痛於今日別有漢陽計掾邠國臺
卿抗希代之奇節負超時之令名坎壈九死離披
再生伊才智之爲患故賢哲之所嬰若乃賈長沙
之數竒崔亭伯之不偶思欲削魯史之高行鉗楊

墨之辨口爲書爲禮驅季俗於三古之前垂譽垂
聲正顏綱於百王之後天子聞之而欲用辟公畏
之而莫取徒窘蠢於泥沙竟龍鍾於塵垢昇平稽
之占人則如彼考之今代又如此近有魏郡王君
曰方華陰楊氏曰亨成能博達奇偉覃思研精徵
孔門之禮樂吞鬼谷之縱橫岳秀泉澄如川如陵
高談則龍騰豹變下筆則煙飛霧凝王則官終於
郡吏楊則官止於邑丞何異夫操太阿以烹小鮮
飛夜光而彈伏翼灼金龜兮訪兆邀玉騏兮騁力

雖勞形而竭思吾固知其不得余之昆兮曰杲之
余之季兮曰昂之杲也杲杲兮如三足之鳥昂也
昂昂焉如千里之駒杲之爲人也風流儒雅爲一
代之和玉昂之爲人也文章卓犖爲四海之隋珠
並蘭馨兮桂郁俱龍駒兮鳳雛生於戰國則管樂
之器長於闕里則游夏之徒以方圓異用遭遇殊
時故才高而位下咸默默以遲遲青青子襟兮時
向晚黃黃我綬兮質如絲昆兮何責坐乾封兮老
矣季兮何負橫武陵而棄之舉天下兮稱屈何暗

室之足欺爲小人之所笑爲通賢之所悲童子尚
知其不可矧衡鏡與著龜故曰至道之精窅窅冥
冥至道之極昏昏默默焚符破壘而人朴鄙剖斗
折衡而人不爭揆工倕之指而天下始巧膠離婁
之目而天下始明然後除其矯黠之患安其性命
之精太平之代萬物肫肫凡聖昭合賢愚淆昏公
卿不接友長吏不迎尊當成康勿用何暇談其兵
甲典讖既作焉得耀其書論雖有晏嬰子產將頓
伏於閭巷雖有冉求季路且耕牧於田園得尋常

之才子又焉可以勝言命鸞鳳兮逐雀驅龍驥兮
捕鼠使掌事者校其功兮孰能與狸隼而齊舉金
爲舟兮璫璫楫不可以涉丘陵些珠爲衣兮翡翠
裳不可以混樵蒸些何器用兮之乖刺悼斯人之
勤多倚長巖以爲枕兮吸流光以高卧見城市以
虛盈若蚊蝱之相過當其時也巢由滿野不知稷
尚之尊周召盈朝莫救夷齊之餓若夫管仲不遇
齊桓則城陽之贅壻太公不遭姬伯亦棘津之漁
夫一仁一義柴也來兮由也醢一忠一孝微子去

之箕子奴聖人百慮而一致君子同歸而殊塗推
旣焚兮脊旣溺桀亦放兮文亦拘筆黃六籍則秦
俗有坑儒之痛黼藻百行則漢家有黨錮之誅鄴
都傾覆飛禍纏於高鼻洛陽板蕩橫死坐其無鬚
嗟吶嚙嘶口含天憲睚眦萬分屍僵路隅變化與
屈伸交逐窮達與存亡並驅因其所有而有之則
萬物無不有就其所無而無之則萬物無不無有
竅而生寧唯混沌無用而飽何獨侏儒是以蘧伯
玉卷兮長卷甯武子愚兮更愚庭有樹兮樹有荆

園有鳥兮鳥有鴿鴿其鳴矣思諸兄矣荆其頓矣
思諸季矣巖有芳桂隰有棠棣枝龍從兮相樛葉
翩翩兮相翳天之生我胡寧不惠何如吉兮初征
悲終凶於未濟

悲窮道

二悲曰淚流公子傷心久之歷萬古以抽恨橫八
荒而選悲有幽巖之卧客兀中林而坐思形枯槁
以崎嶇足聯蹠以緇齧悄悄兮忽愴眇眇兮惆悵
超遙兮獨蹇淹留兮空谷天片片而雲愁山幽幽

而谷哭露垂泣於幽草風含悲於拱木徒觀其頂
集飛塵凡埋積雪骸骨半死血氣中絕四支萎隨
五官欹缺皮襍積而千皺衣聯褰而百結毛落鬢
禿無叔子之明眉唇亡齒寒有張儀之羞舌仰而
視睛翳其若夢俯而動身羸而欲折神若存而若
亡心不生而不滅其所居也不爨其所狎也非人
古樹爲伴朝霞作隣下陰森以多晦傍恍惚兮無
垠松門草合石路苔新公子方撫其背兮曳其裾
曰子非有唐之文士與燕地之高門與昔也子之

少則玉樹金枝及其長則龍章鳳姿立身則淹中
不足言其禮揮翰則江左莫敢論其詩每兢兢於
暗室恒詡詡於明時常謂五府交辟三臺共推朝
紆會稽之綬夕獻長楊之詞痛私門之禍速惜公
車之詔遲豈期晦明乖序寒燠愆度鱗傷羽折筋
擘肉蠹離披於丹澗之隅蔽竦於數山之路已焉
哉已焉哉崑山玉石忽摧頽事去矣事去矣古今
聖賢悲何已天道如何自古相嗟項羽帳中之飲
荆卿易水之歌何壯夫之懦抑伊兒女之情多借

如蘇武生還溫序死節王陵之母伏劍杞梁之妻
泣血事蓋迫於功名情有兼於貞烈若關羽漢陰
田橫海島孤城已迫疲兵向老離離碣石之鴻纂
纂江潭之草迴首永訣吞聲何道及夫獻帝偷生
懷王受死哀西都之城闕憶南荆之朝市鳳凰樓
上隴山雲鸚鵡洲前吳江水一離一別兮漢家宮
掖似神仙獨坐獨愁兮楚國容華競桃李別有士
安多疾顏竒不起馬援困於壺頭冉耕悲於牖裏
平生書劍宿昔琴樽研精殫於玉冊博思浹於銅

東坡先生詩集卷下
新編
渾思欲爲龜爲鏡立德立言成天下之亶亶定古
今之誼誼一朝湜卧萬事寧論君徒見丘中之鏡
朽骨豈知陌上之有遊魂假使百年今上壽又何
足以存存

悲昔

三悲曰竒峯合沓半隱天綠蘿蒙籠水潄浚因嵌
巖以爲室就芬芳以列筵川谷縈迴兮迷徑路山
嶂重復兮無人煙當訝呀之洞壑臨決咽之奔泉
中有幽憂之子長寂寞以思禪暮色踏踏朝思綿

綿形半生而半死氣絕而一連自言少一遊宦
來從北燕淮南芳桂之嶺峴北明珠之川東魯則
過仲尼之故宅西蜀則耕武侯之薄田舊鄉舊國
白雲邊飛雪飛蓬暗遠天暫辭薊北千萬里少別
昭丘三十年昔時人物都應謝聞道城隍復可憐
忽憶揚州楊子津遙思蜀道蜀橋人鴛鴦渚兮羅
綺月茱萸灣兮楊柳春煙波森森帶平沙閣棧連
延狹復斜山頭交讓之木浦口同心之花嚴君平
之上肆戴安道之貧家月犯少微弔吳中之隱士

東晉圖書所
鳳凰銅作龍蕩蕩千門如錦繡巖巖雙闕似芙蓉
題字於扶風之柱繫馬於驪山之松灞池則金人
列岸太華則玉女臨峯平明共戲東陵陌薄暮遙
聞北闕鍾洛陽大道何紛紛榮光休氣曉氛氲交
衢近接東西署複道遙通南北軍漢帝能拜嵩丘
石陳王巧賦洛川雲河水河橋木蘭棧金閨金谷
石榴裙曾入西城看歌舞也出東郊送使君一朝
憔悴無氣力曝骸委骨龍門側當時相重若鴻鐘

今日相輕比蟬翼代情兮共此何余哀之能得使
我孤猿哀怨獨鶴驚鳴蘿月寡色風泉罷聲嗟昊
天之不弔悲后土之無情松架森沉兮戶內掩石
樓摧折兮柱將傾竊不敢當雨露之恩惠長痛恨
於此生

悲今日

四悲曰傾蓋若舊白頭如新嘗爲談過其實辨而
悲真自高枕箕穎長揖交親以蕙蘭爲九族以風
煙爲四隣朝朝獨坐唯見群峯合杳年年孤卧常

對古樹輪囷相弔相哭則有饑飈啼夜相慶相賀
則有好鳥歌春林麇麇兮多鹿山蒼蒼兮少人時
向南溪汲水或就東巖負薪百年之中皆爲白骨
千里之外時見黃塵平生連袂宿昔銜杯談風雲
於城闕弄花鳥於池臺皆是西園上客東觀高才
超班匹賈含鄒吐枚一琴一書校竒蹤於旣往一
歌一詠垂妙製於將來絃將調而雪舞筆屢走而
雲迴自謂蘭交永合松契長并通宵扼腕終日盱
衡罵蕭朱爲賈豎目張陳爲老兵悲蒼黃兮驟變

恨消長之相傾貴而不驕人皆共推安平仲死且
不朽吾每獨稱楊巨卿及其騫產摧聯支離括撮
七濡首兮將死尚搖尾兮求活莊西貸而魚窮姬
東徂而狼跋今皆慶弔都斷存亡永闊憑駟馬而
不追寄雙魚而莫達向時之清談尚在今日之相
知已末則有河濱漂母隴上樵夫盤食帶粟粥面
兼麩藜羹一簋濁酒一壺夫負妻戴男歡女娛攀
重巒之峯萼虛飛澗之崎嶇哀王孫而進饋問公
子之所須因謂余曰可憐可憐聖人之過久矣君

子之罪多焉詩書禮樂適足哀人之神用宗族朋
友不足駐人之頹年削跡伐樹孔席由來不暖摩
頂至足墨突何時有煙一朝至此萬事徒然自昔
相逢把臂談玄橫彫龍於翠瓦飛縞鳳於瓊筵各
自雲騰羽化谷變鶯遷鳴香車於闕下曳珠履於
君前豈憶荒山之幽絕寧知枯骨之可憐傳與千
秋萬古寄言白日黃泉雖有群書萬卷不及囊中
一錢

悲人生

五悲曰禮樂既作仁義不憊死生有命富貴在天
一變一化一虧一全去其外物歸於內篇儒與道
今方計於前其書萬卷其學千年鍾鼓玉帛蹙蹙
躑躑金木水火混合推遷六合之內慕其風兮如
市百代之後隨其流兮若川三界九地往返周旋
四生六道出没牽聯碌碌蠢蠢翱翔受苦受
樂可悲可憐有超然之大聖歷曠劫以爲期戒定
惠解非因人慈悲喜捨非見思聞儒道之高論乃
撞鍾而應之曰止止善男子觀向時之華說乃天

子之辨士請弄宜僚之丸以合兩家之美若夫正君臣定名色威儀俎豆郊廟社稷適足誇耀時俗奔競功名使六義相亂四海相爭我者遺其無我生者哀其無生孰與乎身肉手足濟生人之塗炭國城府庫恤貧者之經營捨其有愛以至於無愛捨其有行以至於無行若夫呼吸吐納全身養精反於太素飛騰上清與乾坤合其壽與日月齊其明適足增長諸見未能永證無生孰與夫離常離斷不始不終恒在三昧常遊六通不生不住無所

處不去不滅無所窮放毫光而普照盡法界與虛空苦者代其勞苦蒙者導其愚蒙施語行事未嘗稱倦根力覺道不以爲功所言未畢儒道二客離席再拜稽首而稱曰大聖哉丘晚聞道聃今已老徒知其一未究其術何異夫戴盆望天倚杖逐日蒼蒼之氣未辨昭昭之光已失嗚呼優優群品遑遑衆人雖鑿其竅未知其身來從何道去止何津誰爲其業誰作其因一翻一覆兮如掌一生一死兮若輪不有大聖誰起大悲請北面而趨伏願終

身而教之

陳 崔 史起蟄 張 秦 方可立

王應辰 聞得仁 王一夔 張遜膚

王焄果 王焄杲 朱廷諫 同 閱

盧照隣集卷下